

水之三千半片衲衣訪洞天之十二清靜門
中無爲路上法味滋身洞然真樂宴坐茅堂
飲清風而推開玄妙之門閑居士屋賞明月
而把握陰陽之髓雖則妻妾兒孫如同樓之
宿鳥金銀珠玉似過眼之浮雲是以喜捨家
緣便歸洞府斷絕不續潑水難收父母妻男
各從方便自今如陌路之人永作他鄉之客
彼出家者並無怠惰之心今在家者一任分
飛之意故所願也謹奉郵書伏惟珍重
○ 全真清規 終

太上出家傳度儀

太上出家傳度儀

左衛都司同奉齋戒內事官唐師雲喜稱集

引弟子於大道前禮三拜上香度師

祝香

以今焚香供養

三清上聖十極高真玉皇天大帝紫微天皇
大帝紫微北極大帝后土皇地祇聖祖天尊
大帝元天大聖后三十二天帝君十神太一
真君十一曜星官天地水三官南北二斗星
官四方二十八宿星官四聖真君三元真君
○ 玄中大法師經籍度三師正一真人五嶽聖
帝儲副佐命大洞仙官三十六洞天仙官七
十二福地三十六靖慮二十四化仙官等四
瀆源玉四海九江水帝龍王地府酆都北帝
出家弟子本命星官宮觀里域真官天曹地
府一切威靈令辰謹有某人弟子某人勿離
俗網早慕
真風今蒙

國恩許圓道相啓壇場於茲且服冠簡於昌
時庶鳩焚修上報真聖仰冀三境慈尊十方

真宰天曹地府一切聖賢曲賜
證明少延輟馭稽首皈依
無極大道

次度師於三師前設案坐華夏引弟
子禮度師三拜面北長跪聽說出家

因緣設香花供養度師上香

謹接真一本際經云爾時青童君問出家之
法何如

天尊曰夫出家者義趣甚深利益供遠出家
有二種一者思愛二者諸有始學之人既值

明師志能勤苦執事奉承餐爰妙訓若在居
家父母妻子愛累相纏如處囹圄不得自在
適意從容遠隨師詢請玄業故告父母請

別妻子捨離居室遠遊山林依憑道舍棄俗
服玩黃褐玄巾捨世榮華隨緣告乞廣建福

田惟道是務是名初出思愛之家既出家已
勤行齋戒免離三塗信根已立學靜入室離

三界愛登入九清是名出諸有之家也
青童君曰我今乃離三惡道願得出離諸有
家不知何者名立正教

天尊曰若有經文具十二部應三洞者是名正經自此之外須辨邪正方可受持當自請師審定分別青童君聞是說已歡喜踊躍稽首而退自是及後凡出家之人既辭恩愛來入法門當發神仙行願貴在自利利他屏去兇心惟生善念敬上接下動止柔和每遇設像諸聖誦真諦信不二晨香夜燈圍繞贊歎五體投地禮拜供養惟冀今生來世與道有緣月帔星冠雲軒羽駕名列九天之上位居三島之中且金簡玉書不容妄度五逆十惡穢雜下流若違明科度師獲罪而况太上垂經天尊說戒遇人不度殃及己身非人而傳禍延祖考所以法門傳授戒慎為先今汝道心深重得生中華仍捨業緣乃趨真教

說良緣今使知道知身性命皆從道生了悟此因長生人道種子不絕世世為人不生無道之鄉不斷人之根本更能心修正道漸入仙宗永離輪迴超昇三界汝既以難生而生難遇而遇不迷真道不入邪宗不縱罪根不為巧詐不好淫殺不愛貪嗔如此則骨相合經堪為法器傳經演教佐國度人今遇良辰圓具道相當知此出家因緣勿生疑惑苟有異志即為下鬼汝其諦聽戒之慎之今再白汝今出家一人有慶九祖沾恩况汝骨氣通仙神情合道慕清虛之聖境脫穢濁之樊籠願效鶩純永歸真聖潔雪形體褻裂俗裝先為召百靈監度五帝證明冀汝名書玉簡體掛霞衣便隨羽客以朝真早獲仙丹而出世今宜先禮

帝主次別慈親後成出世之高人永作登真之上士而今而後只可朝真禮聖不可享鬼拜邪凡所立功先資家國今於庭下拜辭以俟披度

次引弟子於庭下北向禮

帝王
汝欲窺眾妙將悟重玄當脫縫掖之衣即被彩霞之帔永參玉帝上謝人君便長遠於道遙更不須於趨折教起金母勅自軒皇宜北向禮

皇帝四拜

次謝先祖

汝由先祖積慶福及後昆故捨繁華之緣來持清淨之教惟憑焚論以致薦修每逢真祭之時輒修拜跪之禮宜望先隴四拜

次辭父母

汝自違甘旨來入法門雖奉罔極之深恩蓋慕無為之妙道庶持經法以報劬勞由此拜辭有違定省宜辭父母伯叔兄長各四拜

次辭親知朋友

汝久侍巾瓶致疎交友息芳春之駘蕩樂清境之追遊今披羽衣不復俗禮宜辭親知朋友四拜

次華夏引弟子至三師前立知誓請

三師法事

次三歸依

次弟子長跪具白刺自陳如念不得以木簡寫如不用簡紙亦得

某伏念螻蟻穢質不自揆量輒罄愚誠願親眾妙茲者幸承睿旨許具冠裳今就度師虔請教戒庶從願念不敢有違苟違明科不辭陰譴某誠惶誠恐謹言禮三拜訖即立

次度師讀白文

恭以三洞垂文七真演教咸令披度得入妙門功德難思天人稱慶斯乃從凡入聖階淺及深名奏天曹身居仙列苟非宿命寧合因緣汝既自陳道心堅固當報四恩三有以悟獨立重玄今則百靈降格萬聖傾光直須默運度誠無致褻慢宜請保舉二師為脫俗衣以圓道相

次保舉師與脫俗衣先著履度師讚云

汝先足躡雙履永離六塵經云千里之行始於是下此一步為初之意也願汝一心奉道履踐靈壇凡所行遊不步凶惡之地常登法

會運陟仙階每遇二漏之時即須改換

次繫裙度師讚云

裙者羣也以羣統為意羣於道友統以清淨又謂之裳蓋在上為衣在下為裳以表守謙下為常行之法則能如是者災害不生諸聖佑護

次著雲袖度師讚云

輕剪黃雲裁成法服上以襯霜羅之帔下以統飛霄之裙為中道之衣不可須臾離體

次披道服度師讚云

道服者乃天尊老君之法服也真聖護持人天讚仰既沾於體當自欽崇可以滅三世之愆尤可以令九先之超度行住坐卧常須護持不可置之以穢器不得雜之以俗衣苟不如是當招惡報

次知磬舉仙衣讚

上界神仙服天寶自然裳輕盈六銖妙佩服齋三光願今一披奉道遙不死鄉

次頂簪冠度師讚云

汝頂星冠冠者冠也一身之上最處崇高總

括束髮斗星燦爛岳勢巍我像列真之朝元作三洞之妙士不為臣妾蓋假於茲宜其晨夕護持勿令塵埃染汗如自輕慢則天曹奪算念茲在茲則神仙可冀

次令弟子就坐側長跪度師與戴冠

云與道合同三遍

次知磬吟星冠讚

煥耀七星冠翩翩降自天授之有科戒宿命應神仙願今一頂戴永保大椿年

次執簡度師讚云

夫簡者以簡事為言收心斂意為用簡則心專持則有守瞻星禮斗祝聖朝真為道法之光容作人天之儀範能如是者方獲執持

次知磬舉三啓頌

夫戒者止惡防非護正摧邪無令傲忽弗敢輕侮今授汝十戒以護身心諦聽受持不可懈怠

第一戒者心不惡妬無生陰賊檢口慎過想念在法能持否答云能下同

第二戒者守仁不殺憫濟羣生慈愛廣救潤
及一切能持否

第三戒者守正讓義不欺不盜常行善念損
己濟物能持否

第四戒者不貪不慾心無放蕩清潔守慎行
無惡污能持否

第五戒者口無惡言言不華綺內外中直不
犯口過能持否

第六戒者不得嗔怒調和氣性神無所傷不
犯眾惡能持否

第七戒者不嫉人勝已爭競功名每事謙讓
退身度人能持否

第八戒者不得評論經教訾毀聖文躬心奉
法常如對神能持否

第九戒者不得爭競是非評論四輩天人欲
恨損傷神氣能持否

第十戒者舉動施為每合天心常行大慈普
度厄難能持否

天尊曰戒有二種一者有得二者無得有得
戒者三戒五戒十戒二十七戒百八十戒三

百大成止惡防非未達方便名有得戒也止
離三塗及人中苦未入道分若識識法畢竟
空寂是名正戒無持無犯開正觀門為道根
本此名出家持戒也

次舉智慧頌

次聽度師教戒弟子長跪

汝既圓道相初入法門目今已後語默動靜
常須念道念經念師名曰三寶作汝皈依處
所

夫念道寶者能制滅一切惡相猶金剛刀無
所不斷猶如猛火無所不燒念有二種一念
道身七十二相八十一好具足微妙人間天
上三界特尊是我歸依覆護之處二念法身
猶如虛空圓滿清靜即是真道亦名真身亦
名道性常以正念無間餘心是名念道

其次念經寶者有三種洞真洞玄及以洞神
係心受持常生信慕存想不移審知是法是
出世道無他雜念是名念經若知諸法本無
文字正觀實相達其旨趣亦名念經是名善
解念經之相

其次念師寶師寶者父也我若無師不能得
道是故應當遠近隨逐心眼觀想常在目前
不替須臾無諸雜想是名念師三念既已當
上報四恩一天地恩二國王恩三生身父母
恩四師長恩次當下資三有一資天徒二資
地徒三資水徒汝當發大善心晨昏暮燈誦
經行道於諸大道前椿花果寶禮拜供養上
頌

皇帝萬歲家國太平次願生身父母九祖先
亡幽顯沾恩已身得道次願師尊長壽法屬
興隆次願十方信施常蒙道應次願江山朋
友學道知音早遂初心光榮門族次當誘化
一切有情令於三清諸聖結大善緣或建宮
觀或造經像或度出家法身此乃自利利他
功德無量常須柔弱不得剛強經云柔勝剛
弱勝強者是也凡朝禮時節開靜即起入靜
即息對諸大眾不得高聲舉步安庠慎勿粗
行苟非病患不得飲酒茹葷每遇齋筵慎勿
語笑疊足端坐令人天敬仰接見賓客先自
和顏貧富貴賤各隨其心方便應對不得輕

於貧賤而奉富貴裙褐冠簡鞋履襯袖務在潔淨勿要鮮華又不得殺一切物命每見人殺當須勸誘他人有短慎勿言之縱有陰私亦勿舉訐若違此戒身謝之後永墮惡趣餓鬼畜生受諸苦報良朋善友常須親近凶徒惡黨輒勿交遊又不得奉事鬼神學諸邪法不惟洗滌清靜之教抑亦自招陰譴或登靈壇或預經席乘簡端謹如對君父晝夜便旋不得向北當解裙褐以就掩限仍避神祠及諸尊貴事已淨手方拈法服忽見師長及尊宿煖帽方中逍遙急須撤去盤折問訊常懷慈憫拯濟危急勿貪名利勿富貨財勿攻異端勿習幻術勿捨吾教妄親別法勿生健羨以破道心此為修行之要也一動一靜當依十事威儀即無違科律之謫汝既出家紹隆教法將入眾妙與道合真當須屏去三惡洒落六情勸人忠孝勸人樂善不得陰謀不得是非不得訛謗不得色慾不得輕慢不得以強凌弱不得以勢欺人不得竊盜三寶常住及諸尊像衣冠服色竊之即眉鬚墮落足

跛手學死入寒泉受種種苦報常孝順師事及汝父母見男官女冠法身迥相供養勿生彼我當異骨成親服飾售用及諸五穀蔬茹等物常宜愛惜見男弟子女弟子常須演經化誘入我法門令悟重玄朝禮聖真五體投地侍奉師長旦夕問安出送入迎稽首珍重持守清淨恬淡無為不以富貴聲利輒動身心宜行陰德以作今世來生因果冀遇神仙證無上道且九先超度乃在於汝九先沈墮乃在於汝汝當洗心刻意念無差一切聖賢靡不昭鑒今先參禮三師稽依教成禮經師

次引新戒禮三師

列真雅誥上聖綸言蘊三洞之琅函禮九天之金格青囊紫宸寶閣雲房掌八千之靈篇傳四萬之大劫既為道士先奉經師凡所誦持勿令穢觸當運至誠恭禮經師三拜禮籍師

玉錄高真金符上聖主八景之龍章鳳篆藏三清之寶策瑤圖衆聖靈音諸天隱語凡為

道士須奉籍師每當佩錄行符切在施功布德當運至誠恭禮籍師三拜

禮度師

化導真師拔俗至聖蒙度之者星冠月帔荷指之者大戒沖科漸拋塵土之蹤得遂神仙之列幸為道士切奉度師永荷真休常當信禮當運至誠恭禮度師三拜

次十二願

次學仙頌

次回向念善

次引新戒禮大道功德

次禮度師等

太上出家傳度儀